

*Месяца октовриа в 22 день*

**Служба явлению иконы Пресвятыя Владычицы наша Богородицы Казанския.**

*Уставися же сей праздник праздновати в царствующем граде Москве, избавления ради от ляхов, в лето 7121 (1612 от Р.Х.).*

**На велицей вечерне**

*Блажен муж:*

*На Господи возвах, поставим стихов 8, и поем стихиры, глас 4: Подобен:*

**Яко добля:**

**Яко** прекрасная Слова палáта,/ и престол светоносíвый,/ Богорóдице Влады́чице,/ сопрестóльное Слово Отчее/ во Твоих ложеснах вместíла еси́,/ и рождши Свёт незаходíмый,/ наше омрачение просветíла еси́,/ леть змиину отгна́ла еси́/ и тлéние потреби́ла еси́:/ жизнь вéчную миру даровала еси Твоím Рождествóм,/ врата рая отвэрзла еси́,/ и вся благая человеческому естествú даровáла еси́./ Но и ны́не Госпоже, Твоими молíтвами, // избавляй рабы Твоя от всéх бед.

**Яко** велика сущи Царица и Мáти,/ на Небеси превысоких сíл Царя́,/ пречистыя Твоя рúки простёрши,/ молéбно за ны предсто́иши,/ и на земли яко державная помóщница,/ божественною Твоёю ико́ною,/ и дúхом с Твоими рабы пребывáеши,/ и весело спаса́еши,/ и избавляеши от вся́кия напáсти // благочестно Богородицу Тя исповéдающия.

**Яко** златозáрный рай,/ и место прекрасное и богопросвещéнное,/ и древо святое, Духом Святы́м осенéнное,/ вместилище Света невечéрняго,/ Тебе ведущим, ясно немерцающися Божественною лучёю,/ Младенцем Твоим светиши всéй твáри:/ Егóже молящи, Царице Богорóдице,/ спаси град Твой и лю́ди, // к Тебе прибегающия от всех бед.

**Яко** порфирию царскою и виссом, иконою Твоёю,/ и Твоего Сына Богорóдице,/ Церковь Божия просветившися, красúется чудесы́./ Днесь явлением вся созывает прáздновати,/ паче сияния со́лнечнаго,/ благодатию Святаго Дúха блиста́ющися,/ на болящих и недужных исцеления источники источáющи, // и всем дарующи богатую милость.

*Ины стихиры, глас 8:*

**Высо́кий** Царю непостижíмый,/ со Отцем седя́й на престоле и Божественным Дúхом:/ благоволивый родíтися на земли/ от Девы неискусобрачныя Иисúсе:/ ущедря Твое создание, челове́ческое естество́,/ неизречéнными добрóтами,/ прими́ Твоея Матере приносимыя Тебе за ны молíтвы,/ и не помяни беззаконий на́ших, // но помилуй и спаси души наша, я́ко милосéрд. [*Дважды.*]

**Преклонив** небеса Царь славы, сниде обновити Адама, преступлением всего истлевшаго: вселися в Тя Чистая Дево, и родися, ключей девства не рушив, и на руках Твоих смирен Младенец, Иже архангелов Царь ношашеся. И ныне Твою молитву приемлет, и прошение Твое во всем исполняет Богородице, яко Твой Сын и Бог: Емуже усердно молися, да спасет души наша яко милосерд.

**Паче** скинии Моисеевы, по образу небесному сотворенныя, всю Тя Бог освяти, Богородице, Духом Святым: весь вселился в Тя, всего

человека оживи. Тем и Твоя икона, паче Аароня кивота, наполнися благодати Божия, и источает освящение душам и телесем. Ейже любезно покланяющися, просим от Тебе великия милости, да спасеши души наша, благословенная помощнице.

**Слава, и ныне, глас 8:**

**Приидите** возрадуемся державней заступнице рода на́шего,/ Царице Богородице:/ приидите к тихому Ея и чўдному,/ почита́емому а́нгелы,/ честнóму поклонимся о́бразу:/ да́рует бо верным обильныя да́ры целёбныя,/ от неистош́имаго источника святыя ико́ны,/ неоскудную благодать источа́ющи:/ тьмы избавляет нас искушений и бед, и всякаго греха́,/ благочёстно и богоприятно прославля́ющих,/ и чтущих светлую и чудную Богоматере святую ико́ну./ Тем воспевающе воззовём Первообра́зней:/ радуйся любезная миру по́моще, // во спасение ду́ш наших.

*Вход. Прокимен дне.*

*И чтения 3. [Писаны месяца септемвриа во 8 день, Рождеству Богородицы.]*

**На литии стихиры, глас 2, самогласны:**

**Яко** воистинну древняго кивота пречестнее,/ егда Давид собрав чины ликовствоваше,/ ныне Твоя, Богородице, ико́на:/ ейже предстоят архиереев собо́ри,/ и с чинми ангел царие же и князи,/ и все христоименитых людей мно́жество,/ достойно блажат Тя Матерь Бо́жию,/ и прославляют раболéпно,/ и чёствуют и покланя́ются,/ и молятся Тебе по Бо́зе:/ да мир умири́ши в правосла́вии,/ и ца́рския скипетры утверди́ши,/ и спасе́ши от всех зол Тво́я рабы́, // яко едина благословéнная.

Предстоят Ти, Госпоже Богородице, пред Твоим, Пречистая, образом, архиереев сословие, царие и князи, и вси людие, монаси и прости: ведуще Тя воистинну помощницу сильну и непобедиму, моления Тебе приносить от всея души подвизают, и поущают на молитву к Богу, требующе Твоя помощи, да прострещи богоносныя Твоя руки, и умолиши за мир. Вонми и услыши, Владычице, и подаждь утешение рабом Твоим, дондеже не одолеют ны грехи наши тяжкия и лютыя: Твоя бо всегда требуем вси помощи.

**Глас 8:** Первее написавшейся Твоей иконе евангельских таин благовестником, и к Тебе Царице принесенней, да усвоиши ту, и сильну соделаеши спасти чествующия Тя, порадовалася еси, и яко сущи милостива, спасения нашего содетельница, яко уста и глас иконе бывши, якоже и Бога внегда зачинаючи во чреве, песнь воспела еси: се от ныне ублажат Мя вси роди! И на ту зрящи глаголала еси со властью: с сим образом благодать Моя и сила. И мы истинно веруем, яко се рекла еси Госпоже, сим образом с нами еси. Тем благоговейно предстояще, покланяемся Тебе раби Твои, посети ны Твоими матерними щедротами.

**Глас 7:** Гора еси великая и преславная, паче горы Синайския, Богородице: она бо не терпящи снития славы Божия во образех и сенех, огнем возгарашеся, и громи и молнии тамо быша. Ты же, весь Божественный огонь сущь, Божие Слово во чреве Твоем неопально носила еси, и от сосец Твоих млеко питала

еси, манием носящаго вся. И ныне матернее дерзновение к Нему имущи, помози, Владычице, верно празднующим Твой честный праздник, и не забуди милостивно посещаючи: прияла бо еси от Бога дар строити и покрывати христоименитое стадо, рабы Твоя.

*Слава, и ныне, глас 6:*

**Тебе** вси роди человечести хвальныя дары приносят, Владычице, и молятся яко Царице и Матери Божии: пророцы Тя премудро проповедаша, левити благословиша, апостоли и мученицы исповедаша, царие и князи поклоняются, архиерее проповедают, монаси и простии благоговеют, богатии и убозии, сироты и вдовы, и всяк возраст, и всяко преспеяние, старческое и младенческое, под кров Твой державный с верою прибегаем: покрый и соблюди, Госпоже, молитвами Твоими, и спаси от бед души наша.

*На стиховне стихиры, глас 2:*

**Вместилище чистое/ Света пречистаго Богородице,/ како** Ты раби достойно воспеваем?/ **Яко** явлением пречистыя Твоя иконы,/ и Превечнаго Младенца, // вся освящаеши.

*Стих:* **Помяну** имя Твое/ во всяком роде и роде.

**О** Дево нескверная, богородованная,/ что Ти когда таково благодарение принесем,/ яко блаженнаго Твоего Рождества/ всесияющею лучею // всех от тления к жизни возвела еси?

*Стих:* **Слыши** Дщи и виждь,/ и приклони ухо Твое.

**О** Дево Госпоже, Мати Зиждителя, / небесных еси чинов радование, / и человеческому роду благословенная помощнице! // Моли о спасении душ наших.

*Слава, и ныне, глас 5:*

**Воспоем** людие светло Давидскую песнь, / Отроковице Невесте Божии, / и Матери Царя Христа: / предста Царица одесную Тебе Владыко, / рясны златыми одеяна, / и преукрашена божественными благолепотами. / Сию убо яко избранную и добрую в женах, / паче всего мира удобрив, / благоволил еси родитися из Нея великия ради милости: / и Сию помощницу людем Твоим даровал еси, / спасти и покрывати от бед, / всемогущею Твоею и Божественною силою, // Еяже молитвами Христе Бже помилуй нас.

*Тропарь, глас 4:*

**Заступнице усърдная,/ Мати Господа Вышняго,/ за всех молиши Сына Твоего Христа Бога нашего,/ и всем твориши спастися,/ в державный Твой покров прибегающим./ Всех нас заступи о Госпоже Царице и Владычице,/ иже в напастех и скорбех, и в болезнях обремененных грехи многими,/ предстоящих и молящихся Тебе умиленною душею,/ и сокрушенным сердцем,/ пред пречистым Твоим образом со слезами,/ и невозвратно надежду имущих на Тя/ избавления всех зол,/ всем полезная даруй,/ и вся спаси Богородице Дево:// Ты бо еси божественный покров рабom Твоим.**

**На Утрени,**

*на Бог Господь, тропарь, трижды.*

*Величание:*

**Величаем Тя,/ Пресвятая Дево,/ и чтим образ Твой святыи,/ от него же истекает благодатная помощь // всем с верою притекающим к нему.**

*Псалом избранный:*

**Помяни, Господи, Давида и всю кротость его./ Яко клятятся Господеви, обещаюся Богу Иаковлю./ Се слышахом я во Евфрафе, обретохом я в полях дубравы./ Преславная глаголашася о Тебе, граде Божий./ Бог посреде его, и не подвижится./ Клятятся Господь Давиду истиною и не отвержется ея./ От плода чрева Твоего посажду на престоле Твоем./ Яко избра Господь Сиона, избови его в жилище Себе./ Осветил есть селение Свое Вышний./ Святыня и велелепота во святиле Его./ Свят храм твой, дивен в правде./ Дому Твоему подобает святыня, Господи, в долготу дней./ Помяну имя Твое во всяком роде и роде./ Благословен Господь во век и в век века.**

*Таже степенна, 1-й антифон 4-го гласа.*

**Прокимен:** Помяну имя Твое/ во всяком роде и роде.

**Стих:** Слыши, Дщи, и виждь, и приклони ухо Твое.

*Всякое дыхание: Евангелие Луки, зачало 4.*

*По 50-м псалме стихира, глас 8:*

**Приидите возрадуемся державней заступнице рода нашего,/ Царице Богородице:/ приидите к тихому Ея и чудному,/ почитаемому ангелы,/ честному поклонимся образу:/ дарует бо верным обильныя дары целбныя,/ от неистоимаго источника святых иконы,/ неоскудную благодать источающи:/ тмы избавляет нас искушений и бед, и всякаго греха,/ благочестно и богоприятно прославляющих,/ и чтущих светлую и чудную Богоматере святую икону./ Тем воспевающе воззовем Первообразней:/ радуйся любезная миру помощи, // во спасение душ наших.**

*Канон Пресвятой Богородице, Одигитрию, со ирмосом на 6.  
Творение иеромонаха Игнатия. Глас 4.*

*Песнь 1. Ирмос:*

**Отверзу уста моя,/ и наполнятся Духа,/ и слово отрыгну Царице Матери,/ и явлюся светло торжествуя,// и воспою радуясь То́я чудеса́.**

*Катавасиа: Отверзу уста моя:*

*Песнь 3. Ирмос:*

**Твоя песнословцы Богородице,/ живой и независтный источниче,/ лик себе совокупльшия,/ духовно утверди, в божественней Твоей сла́ве// венцев сла́вы сподоби.**

*Песнь 4. Ирмос:*

**Седя́й в славе,/ на престоле Божества,/ во облаце легце,/ при́иде Иису́с Пребоже́ственный,/ нетленную дланию,/ и спасе зовущия:// слава, Христе́, силе Твоей.**

*Песнь 5. Ирмос:*

**Ужасошася всяческая/ о божественней славе Твоей:/ Ты бо Неискусобрачная Дево,/ имела еси во утробе над всеми Бога,/ и родила еси Безлетнаго Сына,/ всем воспевающим Тя// ми́р подава́ющая.**

*Песнь 6. Ирмос:*

**Божественное сие и всечестное/ совершающе празднество/ богомудрии Богоматере,/ приидите руками восплецим,// от Нея рождагося Бо́га славим.**

*Кондак, глас 8: Подобен: Взбранной:*

**Притецем людие к тихому сему и доброму пристáнищу,/ скорой помощнице, готовому и теплomu спасению, покрову Де́вы./ Ускорим на молитву и потщимся на покаяние:/ источает бо нам неоскудная милости Пречистая Богородица,/ предваряет на помощь, и избавляет от великих бе́д и зóл,// благоднравныя и богобоящияся рабы Своя.**

*Песнь 7. Ирмос:*

**Не послужиша твари богомудрии/ паче Созда́вшего,/ но огненное прещение мужески попра́вше,/ радовахуся поюще:// препетый отцев Господь и Бо́г благословен еси.**

*Песнь 8. Ирмос:*

**Отроки благочестивыя в печи,/ Рождество Богородичо спасло́ есть,/ тогда убо образу́емое,/ ныне же де́йствуемое,/ вселенную всю воздвизает пéти Тебе́:/ Го́спода пойте дела́,// и превозносите Его́ во вся веки.**

*Песнь 9. Ирмос:*

**Вся́к земноро́дный/ да възграется Духом просвещáемь,/ да торжествует же безплотных умóв естество́,/ почитающее священное торжество́ Богомáтере,/ и да вопиёт:/ ра́дуйся Всеблаже́нная// Богородице, Чи́стая Присноде́во.**

**На хвалитех стихиры, на 4, глас 4:**

**Прославим** вернии обрадованную Богородицу,/ паче же во устех наших íмамы/ всегда́ святое и благословенное íмя Ея́,/ непрестанно прибега́юще/ к пречистей Ея и цельбоносней ико́не:/ Тою бо обретаем яже на земли вся благая и полéзная,/ и сущих на воздухе от демонов запинаний избавля́емся,/ яко Мати рожда́ющая всéх Творца́, // спасает от бед души на́ша. [Дважды.]

**Да** рыдает вечно сонм злочестíвых,/ не исповедающих Тя́ в рождестве́/ Чíстую Богороди́тельницу,/ и не поклоняющихся пречистей Твоей ико́не:/ вернии же люди раду́ющиеся испове́дуем Тя́/ и́стинную Деву Богороди́цу,/ яко воистинну родила еси плотию Христа Бога на́шего./ Тление Адамово попрáла еси,/ и от греха́ весь мир очíстила еси́,/ жизнь безконечную дарова́ла еси́,/ райский вход верным отверзла еси́ Божественным Твоим Рождество́м./ Егоже моли, спасти́ся на́м // поющим верно Твое та́инство.

**Радуется** убо и веселится неизреченною ра́достью,/ все множество благочестíвых:/ припада́юще же поклоня́ются,/ вси благоговеют Божии Матери с боя́знию,/ благодаряще Сию по Бо́зе,/ яко Бога толиких превеликих благ ходата́ицу,/ в неже желают ангели прини́кнуты,/ дарова Богородицею верным Христос Бо́г на́ш,/ имей мнóжество щедро́т, // и великую пребогатую ми́лость.

*Слава, и ныне, глас 8:*

**Святáя** Твоя и сообразная икона Богородице Дéво,/ благода́тию Твоею пребогаты́й сущий исто́чник,/ кипящий всей подсо́лнечней,/ и светя́щий всему миру светолучными Святаго Духа сия́ньми,/ и исцелéний светлостью́./ Ты бо Бога Слова плотию несказáнно родила́ еси́,/ от архáнгела Гавриила сицева́я слы́шавши:/ радуйся обрадованная, Господь с Тобо́ю,/ и Дух Святы́й осенит Тя к зачáтию./ Та́кожде рекла еси к первописанной Твоей иконе, на ту зря́щи:/ с тою Моя благода́ть, и слово Твое со вла́стью ико́не бы́сть./ И образ и глас, и си́ла и де́ло,/ и вся́к ум превосходя́щая Божéственная благода́ть,/ спребыва́ющи вечно, знамения и чудеса непрестанно содева́ет,/ и душеполезное исцеление всем верно приходя́щим подаёт, // Твоими Богоматерними непрестанными к Богу моли́твами.

*Славословие великое. И отпуст.*

*На Литургии, служба Богородицы.*